

20. august 2015

UKA 2015/28

Inatsisartut Sulieriaasianni § 33 naapertorlugu, matumuuna aalajangiiffigisassatut siunnersuut saqqummiuppara:

Imartami sillimaniarnerup, umiarsuarnik nalunaarsuinerup, inatsiseqarnerup il.il. tamakkii-sumik oqartussaaffigineqalersinnaaneri pillugit Naalakkersuisut UKA2016-mi nassuiaammik saqqummiussinissamik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nikolaj Jeremiassen, Siumut)

Tunngavilersuut:

Kalaallit nunatta imartai tassaapput inunnik usinillu assartuiffiusut, imarpillu ikaarlugu nunarput nioqqutissanik pilersorneqarluni. Taamaattorli aamma taanngitsoorsinnaanngilara imartavut tassaammata annertuumik aalisartoqarfiusut.

Ilanngullugu maluginiagassaavoq naalagaaffik nunatsinni inissisimasumik imaatigut angallannermut, aalisariuteqarnermut isumannaallisaanermullu ingerlatsisumik immikkoortortaqaqarqarnera. Oqartussaaffiit namminersorneq pillugu isumalioqatigiissitap isumaliutissiisutaani sukumiinerusumik naalagaaffimmut isumaqatiginninniareernikkut tiguneqarsinnaasutut suliaasaqarfittut II-tut allattorsimapput.

Tamanna namminersorneq pillugu inatsisip nassuiaatitaani Imaani isumanaallisaaneq-mik qulequtaqartumi (allattugaq II, nr. 20), tassani imaani isumannaallisaanermi inatsimmi umiarsuit assigiinngitsut sannaat, atortui ingerlanneqarnerilu pillugit maleruagassat aalajangersarneqarput; taamattaarlu umiarsuarni sulinermi atugassarititaasut, umiarsuaatileqatigiit umiarsuillu naalagaasa akisussaaffii, umiarsuit aallaqqusaajunnaartarneri, suliffeqarfiit umiarsuarnik aalajangersaasartut, umiarsuit uuttortarneqartarnerat, allagartalerneqartarnerat kiisalu nakkutilliinerit aqutsinerillu. Taamattaarlu oqartussaasoqarfiit ajutoortoqartillugu misissuisartut, imaani angallannermi malittarisassat il.il. kiisalu inuttaqarnermut piginnaasanik piumasaqaatit il.il. umiarsuarnut, inuttanut il.il. Immikkoortup taassuma nunarsuarmioqatigiinnut atuuttunut annertuumik malittarisassaqaartinneqarnera naliginnaasuvoq, taakkulu atuutsinneqarnerat nunami malittarisassiornikkut isumagineqartarpoq.

Ilanngullugulu namminersorneq pillugu inatsisip nassuiaatitaani umiarsuit nalunaarsorneqartarnerat imaanilu inatsisinut il.il. tunngasunut allassimavoq, oqartussaaffiit umiarsuarnut umiarsuaatileqatigiiffinnut il.il. tunngasut oqartussaaffeqarfimmi aamma pineqartut (allattorsimaffik II, nr. 21), tassungalu ilanngullugit qularnaveeqqusiissutinut uppersaasatit, akisussaaffiit, umiarsuarnik sillimmasiinerit kiisalu assartuussinernut isumaqatigiissutit. Taamatuttaarlu oqartussaaffeqarfimmi

aamma pisortanut kiisalu sulianik ingerlatsinerni apeqqutit ilaapput, tassunga ilanngullugit umiarsuit sorliit danskit erfalasuannik erfalasoqarsinnaaneri, eqqartuussivikkoortumik nassui-aateqarneq il.il. kiisalu umiarsuaatileqatigiit nunani allani oqartussaasunut attaveqarnerat il.il.

Isumaqarpunga sulissutigilertariaqaripput tamakkiisumik tamakkununga aqutsiveqalernissarput. Inuiaqatigiuvugummi imartatsinnik misilittagaqarluartut atuiluurtullu. Tassami qangarsuaaniilli qajaannarnik umiaannarnillu siulitta nunarput siammarfigisimavaat, allaammi ullumikkut Kalaallit Nunaata kitaata annersaa inoqarfeqalersimalluni.

Nunatsinni imartatsinnut aqutsiveqalernitsigut nunatta inuisa ilisimasaat atorluaneqarsinnaatilissavagut, imaanimi angallannermi maleruagassat eqqarsaatigalugit tamakkua ilisimasat pitsanngorsaanermut atorluaneqarsinnaagamik.

Ilisimavara imartamik atuinermut nunarsuarmioqatigiit malittarisassaqarnerat. Aqutsiveqarfeqalerutta nunarput nammineerluni toqqaannartumik nunarsuarmi isumaqatigiissusiortarnernut akuusinnaalissaaq, taamaalillutalu issittumi imartaq pillugu ilisimasavut aamma iluaqutigisinnaassallutigit. Imartamut aqutsiveqarfik tassaavoq imartani imarsiortunullu tunngaviumik isumannaatsumik angalanissamut suliaqartartoq. Uagut kalaallit tassaavugut inuiaqatigiit imartatta iluliaqartarnera sersuarmiillu uukkaasartoqarfeqarnera, minnerunngitsumillu aamma nunatta kangiata imartaaniit sikorsuit kitaanut uiartarneri eqqarsaatigalugit ingerlatsilernissamut ilisimasanillu avitseqateqarnissamut ajukkunnaateqanngitsut.

Siunnersuutip nunatsinni imarsiornerup inuiaqatigiinnut iluaqutinngortinnissaa siunertarimmagu oqallilluarnissarput neriuutigaa.

Siunnersuutip aningaasatigut allaffissornikkullu pisortanut kinguneqaatissai

Nassuiaammik saqqummiussassamik suliaqarneq allaffissornikkut aningaasartuutaanissaa naatsorsuutigineqarpoq, tamanna ukiup affaanik sulinermik naleqassaaq (250.000 kr. missaani).

Taassuma saniatigut Naalagaaffiup ingerlatani aningaasartuutininik pineqartunut nalunaarsuinermini aningaasartuuteqassaaq. Aningaasartuutilli taakku killeqarnissaaq ilimanarpoq.

Imartami sillimaniarnerup, umiarsuarnik nalunaarsuinerup, inatsiseqarnermillu akisussaaffimmik tiguisoqasappat aningaasartuutit ersarissarneqarsinnaapput Ineqanermut, Sanaartornermut Attaveqatigiinnermullu naalakkersuisoqarfiup § 37-ikkut apeqquteqaatinni nr. 196-imi akissutaat naapertorlugu Imarsiornermut Aqutsisoqarfiup Kalaallit Nunaanni ingetlartsivii pillugit aningaasartuutitut apeqqutit akineqarpata.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai
Soqanngilaq.